

Pak Lah: Jangan jadikan keputusan PRU13 isu perkauman
SINARHARIAN ONLINE
8 Mei 2013

KUALA LUMPUR - Tun Abdullah Ahmad Badawi hari ini berkata pengganti beliau Datuk Seri Najib Tun Razak masih menjadi pemimpin terbaik untuk menerajui negara selepas pilihan raya umum.

Bekas Perdana Menteri itu berkata beliau memberikan sokongan penuh kepada Najib dan berharap perdana menteri akan meneruskan agenda transformasi beliau.

"Rakyat Malaysia telah memberikan isyarat jelas yang mereka mahukan perubahan dan Najib perlu respons kepada itu dengan mempergiatkan lagi program transformasi beliau untuk menangani isu seperti rasuah, jenayah dan kos hidup.

"Saya percaya beliau sudah mempunyai strategi-strategi untuk melakukan penambahbaikan dalam bidang-bidang berkenaan," kata bekas Perdana Menteri itu dalam kenyataan hari ini.

Abdullah kini berada di Bahrain untuk menghadiri mesyuarat tahunan ke-31 Majlis Antara Tindakan.

Abdullah yang melepaskan jawatan awal 2009 berkata, beliau juga ingin menyeru supaya rakyat bersatu padu dan sedia untuk bermuafakat.

"Kita tidak boleh membiarkan sebarang percubaan untuk menjadikan keputusan pilihan raya sebagai isu perkauman.

"Tindakan tuduh-menuduh dan menyalahkan mana-mana komuniti adalah tidak adil dan tidak memberi manfaat," katanya. Abdullah juga mahu pihak pembangkang untuk menerima dan menghormati keputusan pilihan raya.

"Rakyat Malaysia berhak untuk menikmati kestabilan dan kepastian yang hanya tercapai apabila semua pihak dapat memperakui keputusan pilihan raya.

"Marilah kita terus maju ke depan demi kepentingan semua rakyat Malaysia," katanya.

Hakcipta ©2012 | Hakcipta Terpelihara Grup Digital Karang kraf

Source: <http://www.sinarharian.com.my/nasional/pak-lah-jangan-jadikan-keputusan-pru13-isu-perkauman-1.158290>